

Aðalfundur Ísalp 26.09.2018

Mætt eru: Páll Sveinsson, Karl Ingólfsson, Baldur Þór Davíðsson, Matteo Meucci, Helgi Egilsson og Jónas G. Sigurðsson.

Kjörinn fundastjóri er Páll Sveinsson og ritari fundarinn er Jónas G. Sigurðsson.

Helgi kynnir skýrslu stjórnar síðasta starfsárs.
Ársskýrsla samþykkt samhljóða og er í viðhengi hér að neðan.

Helgi kynnir ársreiking.
Ársreikningur samþykktur samhljóða.
Vinsamleg ábending til bókara er að gera ársreikning skýrari og meira liðaðan niður

Lagabreytingar – Hafa ekki borist.

Kjör stjórnar.

Í kjöri til formanns eru: Jónas G. Sigurðsson – sjálfkjörinn.

Í kjöri til stjórnarsetu eru: Védís Ólafsdóttir, Sif Pétursdóttir, Ottó Ingi Þórisson, Bjartur Týr Ólafsson, Baldur Þór Davíðsson,

Í stjórn voru kjörin: Ottó Ingi Þórisson (kjörinn til tveggja ára), Védís Ólafsdóttir (Kjörin til eins árs) og Sif Pétursdóttir (kjörin til eins árs).

Kaffiupphællari verður: Baldur Þór Davíðsson (Kjörinn til tveggja ára)

Á næsta aðalfundi lýkur kjörtímabili hjá: Sigurður Ýmir Richter, Matteo Meucci, Védís Ólafsdóttir og Sif Péturdóttir

Ákvörðun árgjalds fyrir næsta ár: Fundur kýs um 4190 isk.
Tillaga sigrar 4 atkvæði á móti 2.

Önnur mál:

Samút:

Karl Ingólfs kynnir félagið og sækir um umboð félagsins til að starfa fyrir hönd Ísalp í stjórn Samút og óskar eftir einum til viðbótar að koma með sér inn í Samút.

Helgi fer með Karli í Samút og Karl fær einróma samþykkt umboð til setu í Samút í nafni Ísalp.

Matteo og tryggingar:

57 evrur á ári til að vera meðlimur í Ítalska alpaklúbbnum. Uppástungan er að bjóða meðlimum að borga þetta verð ofan á árgjaldið til að fá tryggingu sem gildir í allri útivist allstaðar í heiminum.

Fundi lýst vel á þessa uppástungu.

Skýrsla stjórnar ÍSALP 2018

Stjórn ÍSALP 2018 skipuðu Helgi Egilsson, formaður, Ottó Ingi Þórisson, gjaldkeri, Sigurður Ýmir Richter ritari, og meðstjórnendurnir Jónas G. Sigurðsson, Baldur Davíðsson, Matteo Meucci og Bjartur Týr Ólafsson.

Baldur var kosinn til eins árs en Sigurður og Matteo til tveggja ára.

ÍSALP byrjaði starfsárið á að skrifa undir samning milli klúbbsins, Klifurfélags Reykjavíkur og bænda á Hnappavöllum, sem staðfestir leyfi bænda fyrir iðkun klifurs í Hnappavallahömrum og útlistar takmörk fyrir því hvað má gera á svæðinu. Þetta er eitt af hagsmunamálum klifrara sem ÍSALP hefur unnið að á árinu.

Alpaklúbburinn hefur mjög lítið nýtt sal Klifurhússins síðustu ár og ákvað Klifurhúsið að fella niður leigugjöld fyrir salinn. Við höfum ekki fundað um framhaldið, en erum vongóð um áframhaldandi farsælt samstarf.

Heilmikil vinna var lögð í Bratta, sem býr sem stendur í Kópavogi. Björgunarsveit Akraness undirbjó grunn undir skálann sumarið 2017 og Ferðafélagið undir stjórn Stefáns Jakobssonar hófst í kjölfarið handa við að smíða inn í skálann. Eftir áramót 2018 var skálinn tilbúinn til flutnings en þegar sækja átti um leyfi til flutnings kom í ljós að Bláskógabyggð gat ekki gefið leyfi til flutningsins þar sem Súlnadalur er orðin þjóðlenda. Við höfðum fengið leyfi frá Þingvallabjóðgarði með samþykki frá Þingvallanefnd og áður en Þingvallanefnd fékk málið til umfjöllunar hafði óháð verkfræðiskrifstofa skoðað málið í kjölinn. Allt kom fyrir ekki og skálinn fór ekki upp vorið 2018. Við tók tímabil skrifræðis og pappírsvinnu sem enn stendur yfir. Bláskógabyggð er að útbúa deiliskipulag fyrir svæðið og eftir að það er tilbúið munum við fara fram á að forsetisráðuneytið auglýsi eftir umsækjendum um lóðina. Þetta er búin að vera heilmikil vinna og á tímum hefur hún tekið á taugar formanns. Það er mín skoðun að málinu væri sjálfhætt ef ekki hefði verið stofnað til samstarfs við Ferðafélagið um málið, en þeir hafa borið þungann af vinnunni og allan kostnað frá því þeir komu inn í samstarfið. Þeir eru búnir að leggja í kringum 1000 vinnustundir í skálann og kostnaður nálgast 10 milljónir. Við bindum vonir við að koma skálanum upp vorið 2019.

Haukur Már Sveinsson tók að sér síðasta haust að vera umsjónarmaður turnsins í Gufunesi. Það var síðan ráðist í framkvæmdir á turninum núna í sumar. Grindin var tekin niður og er framtíð hans óljós. Vonandi er hægt að setja grindina aftur upp og koma turninum í stand en annars eru ÍTR menn mjög fúsir að finna aðrar lausnir, svo sem að byggja með okkur nýjan vegg.

ÍSALP fundaði með Klifurhúsinu í september og skerpti á BÍS reglum. BÍS tímar voru miðvikudagar frá 21.30-23 og föstudagar frá 21-23. Við þurfum að vanda okkur vel við BÍS-ið bæði varðandi umgengni og slyshættu ef þetta samstarf á að ganga áfram. Annars var BÍS-ið óvenju lítið sótt síðasta vetur.

ÍSALP og FBSR héldu saman búnaðarbazar 16.nóvember sem var ágætis upphitun fyrir stórviðburð, en Afmælishátíð Alpaklúbbsins var haldin daginn eftir, 17.nóvember. Hún var vægast sagt vel heppnuð og á undirbúningsnefndin mikið hrós skilið. Baldur lánaði sal fyrir veisluna og Grillvagninn sá um matinn. Matteo kom með ísmola af Sóló til að kæla ölið.

60 manns borguðu sig inn í partýið. Klúbburinn keypti flottan skjávarpa í afmælisgjöf handa sjálfum sér og kostnaður við viðburðinn var í kringum 200.000 kr.

Undanfarið ár höfum við af og til verið í samskiptum við Vatnajökulspjóðgarð sem vildi fyrst banna klifur í Skaftafelli, sem við mótmæltum harðlega. Eftir áramót boltuðu erlendir klifrarar

síðanmixleið í Ásbyrgi og varð klúbburinn eins konar milliliður milli klifraranna og þjóðgarðarins. Allir rólegir núna skilst mér. Það varð eilítið drama til viðbótar í Örafunum þegar Einar Örafingur klifraði leið sem reyndist vera í óþökk bænda. Það kom fram ósk um að klifurleiðin yrði fjarlægð úr gagnagrunni ÍSALP en ekki var orðið við því.

Frábært ársrit leit dagsins ljós í desember og var um virkilega veglegt afmælisrit að ræða. Haldið var útgáfuhóf þar sem 50 manns mættu. Tveir kútar kláraðir og þónokkur stemmning.

Ísklifurfestival 2018 var haldið á Austfjörðum. Það var vel sótt og vel skipulagt. Veðrið var allaveganna en allir náðu í það minnsta að klifra eitthvað.

Benni og Albert Leichfried héldu myndasýningu fyrir ÍSALP á Center Hotel Plaza 15.febrúar og Fjallakofinn borgaði helminginn af leiguverðinu á salnum.

Alpaklúbburinn sendi frítt föruneysi til Slóveníu í mars í vikulanga fjallaskíðaferð. Þar voru viðtökur höfðinglegar, gist í fjallaskála og skíðað með atvinnuleiðsögumönnum á daginn. Þetta er hluti af Erasmus samstarfi þriggja landa sem komið var á koppinn í fyrra. Í ágúst sendi ÍSALP síðan hóp félagsmanna í klifurferð til Ungverjalands og Slóvakíu. Af þeirri ferð var einnig afar vel látið. Í apríl 2019 kemur að okkur að taka á móti fjallamönnum frá Ungverjalandi og Slóveníu á Tröllaskaga og er undirbúningur fyrir það í fullum gangi núna.

Banff var haldið í Maí í Bíó Paradís. Mjög vel heppnað og undirbúningurinn fyrr á ferðinni en oft áður.

ÍSALP lét prenta 110 boli í vor. Þeir eru til sölu í klifurhúsinu og hvetjum við alla til að ná sér í eintak.

Við gerðum enn eina tilraunina til að halda Stardalsdag og dótaklifurkynningu í Klifurhúsinu. Veðrið setti eitthvað strik í reikninginn og skipulaginu aðeins breytt en námskeiðið haldið engu að síður og mættu 8 byrjendur.

Starfsárinu var síðan slútað á bjórkvöldi á knæpu í miðbænum á laugardaginn síðasta. Þar mættu rúmlega 40 félagar og skemmtu sér prýðilega.